

**NUJ desak Umno tarik balik larangan terhadap Mkini
Malaysiakini.com
October 20, 2010**

Kesatuan Wartawan Kebangsaan Malaysia (NUJ) mendesak supaya larangan terhadap *Malaysiakini* dan wartawan portal berita alternatif itu untuk membuat liputan perhimpunan agung Umno, ditarik balik.

NUJ mahu dikembalikan *status quo* agar setiap organisasi media dapat membuat liputan perhimpunan tersebut yang sedang berlangsung di Pusat Dagangan Dunia Putra (PWTC) mulai hari ini, tanpa sebarang halangan.

Presiden NUI, Hata Wahari berkata kesatuan itu kesal serta dukacita dengan tindakan Umno menghalau wartawan *Malaysiakini* dari pusat media.

Dalam satu kenyataan, beliau berkata, NUI melihat tindakan itu sebagai tindakan kebelakang dalam mendukung kebebasan media.

Menurut Hata, tindakan Umno itu juga memperlihatkan sikap tidak mesra media dan tidak selari dengan ucapan Presiden Umno, Datuk Seri Najib Tun Razak semasa menutup forum antarabangsa mengenai pembentukan warga global: librasasi media dan realiti politik baru semalam.

Katanya, dalam ucapan tersebut, Najib berkata media boleh memainkan peranan penting bagi menghapuskan ekstremis di dunia.

"Malangnya, Umno yang diketuai oleh Datuk Seri Najib tidak memegang prinsip yang dilaung-laungkan dan sikap-sikap itu terbukti dengan tindakan menghalau wartawan *Malaysiakini* dari berada di pusat media perhimpunan agung Umno," tambahnya.

Sehubungan itu, NUI mendesak agar larangan terhadap *Malaysiakini* dan wartawan portal berita alternatif itu ditarik balik.

"NUI Malaysia meminta presiden Umno bertanggungjawab sepenuhnya dalam hal ini dan mengeluarkan arahan kepada setiausaha agung Umno agar tindakan menghalang organisasi media untuk membuat liputan pada perhimpunan agung itu di tarik balik dengan segera," tegas Hata.

Menurutnya, NUI juga menerima aduan dari beberapa ahli yang mendakwa permohonan mereka untuk mendapat pas untuk membuat liputan perhimpunan agung itu ditolak walapun permohonan itu dibuat melalui organisasi media yang dikuasai oleh Umno.

"Sebab-sebab mengapa sesetengah wartawan tidak dikeluarkan pas perhimpunan agung tidak dinyatakan semasa penolakan tersebut," tambahnya.